

高級阿 sir 應去**續大**受訓

是日也，梁慧思寫半島電視台，精彩。呢個地球，其實每天每時都有好多大事情發生，各地媒體亦以不同的方式探索着許許多多關乎人命安危和人性尊嚴的事情，有時候即使係報道一些類似八卦醜聞的事件，亦會認認真真地睇個清楚明白，希望找出頭緒，引導讀者和觀眾思考一個更美好的明日世界。

只可惜嚮呢個香港地，有好多傳媒，日日頭版兼幾版用最煽情、最低下、最浮淺的手法去做所謂「淫照」新聞，甚至有刊物期期推出所謂「精美特刊」，利用別人不幸流失的私房圖像，亦即係「賊贓」吸引讀者。唉，所謂「專業求真」、所謂「追求真相良知」，諗落確係幾好笑。

但幸好，顯然唔係所有香港人都受落呢類報道，至少亦有好多人識得感嘆反思，例如關仁求其上網都見到以下呢類思 考文字：

阿某君嚮 facebook 話：「蘇丹人道主義災難：暴徒用鎖鏈綁女學生放火焚燒——而竟然有人還對陳冠希的私人生活感興趣。」阿乜君又響 blogspot 話：「那些照片。已經忘記是第幾天了關於那些照片。走過報攤，報紙雜誌全都是男女的私密照。不期然皺了眉，很傷感。大抵因為尋常。雖然，我們不如照片中的主角或俊朗或美麗但，都是尋常的動作與表情。熟悉的尋常事。譬如以雙手撫摸柔軟的胴體，又譬如跪下來，親吻對方的最敏感處。互相攝取溫暖、表達愛欲的肢體語言，其實我們都會做。原以為尋常的事不斷被刻意複製和放大，真的，我莫名其妙地感到心酸。」唯望多啲人識得由唔同角度出發反省，唔好淨係好似獵巫一樣，一味強調抽出事件裏的所謂「原罪者」而要求將之懲罪、踐踏、打壓。

講開又講，警方對此事的反應方式實在幼稚可笑，幾位高級阿 sir 其實最應該接受文化研究的通識教育，政府應該撥款請**續大**教授陳清僑去教教他們！